



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՎԱՐՉԱՊԵՏԻ ԱՇԽԱՏԱԿԱԶՄԻ ՂԵԿԱՎԱՐ**

0010 ք. Երևան, Կառավարական տուն 1

№ 02/05.31/12850-2025

**ԱԶԳԱՅԻՆ ԺՈՂՈՎԻ ԱՇԽԱՏԱԿԱԶՄԻ ՂԵԿԱՎԱՐ-ԳԼԽԱՎՈՐ ՔԱՐՏՈՒՂԱՐ
ԴԱՎԻԹ ԱՌԱՔԵԼՅԱՆԻՆ**

Հարգելի՛ պարոն Առաքելյան,

Համաձայն «Ազգային ժողովի կանոնակարգ» Հայաստանի Հանրապետության սահմանադրական օրենքի 66-րդ և 77-րդ հոդվածների՝ Ձեզ ենք ներկայացնում՝

1) «Հայաստանի Հանրապետության քրեական օրենսգրքում փոփոխություններ և լրացումներ կատարելու մասին» Հայաստանի Հանրապետության օրենքի նախագծի (Պ-998-20.01.2025-ՊԻ-011/0) վերաբերյալ Հայաստանի Հանրապետության կառավարության առաջարկությունը,

2) Հայաստանի Հանրապետության վարչապետի 2025 թվականի ապրիլի 18-ի «Հայաստանի Հանրապետության կառավարության ներկայացուցիչ (հարակից զեկուցող) նշանակելու մասին» N 318 - Ա որոշումը:

Հարգանքով՝

ԱՐԱՅԻԿ ՀԱՐՈՒԹՅՈՒՆՅԱՆ

Կատարող՝ Ագնեսա Առաքելյան
Ազգային ժողովի հետ կապերի վարչություն
Հեռ. 515403
Էլ փոստ՝ agnes.aarakelyan@gov.am

ԱՌԱՋԱՐԿՈՒԹՅՈՒՆՆԵՐ

«ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՔՐԵԱԿԱՆ ՕՐԵՆՍԳՐՔՈՒՄ ՓՈՓՈԽՈՒԹՅՈՒՆՆԵՐ և ԼՐԱՑՈՒՄՆԵՐ ԿԱՏԱՐԵԼՈՒ ՄԱՍԻՆ» ՕՐԵՆՔԻ ՆԱԽԱԳԾԻ ՎԵՐԱԲԵՐՅԱԼ

«Հայաստանի Հանրապետության քրեական օրենսգրքում փոփոխություններ և լրացումներ կատարելու մասին» Հայաստանի Հանրապետության օրենքի նախագծի վերաբերյալ հայտնում ենք հետևյալը՝

1. Նախագծով առաջարկվում է թմրամիջոցների ապօրինի շրջանառության դեմ պայքարի արդյունավետությունը բարձրացնելու նպատակով խստացնել դրա դեմ տարվող պատժողական քաղաքականությունը՝ պատիժների խստացման եղանակով:

Անդրադառնալով թմրամիջոցների ապօրինի շրջանառության համար նախատեսված քրեական պատասխանատվության խստացմանը՝ հարկ է նկատել, որ քրեական իրավունքի տեսության մեջ հանցավորության դեմ պայքարի միջոցների համակարգում պատժի դերը կարևոր է, սակայն հանցավորության աճի միտումը կախված է նաև այլ գործոններից՝ տնտեսական, քաղաքական, կազմակերպակառավարչական: Պատիժն այն միջոցներից մեկն է, որի օգնությամբ պետությունը, ազդելով հանցավորության վրա, փորձում է պահել այն որոշակի սահմանների մեջ: Այս համատեքստում, պետք է նկատի ունենալ, որ հանցավորության դեմ պայքարի արդյունավետ միջոցներից են օրենքների գործնական, օպերատիվ կիրառումը և հանցագործությունների հուսալի բացահայտումը:

Հարկ է ընդգծել, որ քրեական օրենսգրքում յուրաքանչյուր արարքի համար քրեական պատասխանատվության, սույն դեպքում՝ պատժի տեսակը և չափը սահմանված են որոշակի չափորոշիչներ հաշվի առնելով: Մասնավորապես, ՀՀ սահմանադրությամբ ամրագրված պատժի համաչափության սկզբունքի համաձայն՝ օրենքով սահմանված պատիժը, ինչպես նաև նշանակված պատժատեսակը և պատժաչափը պետք է համաչափ լինեն կատարված արարքին: Հետևաբար՝ այս կամ այն հանցավոր արարքի համար պատժատեսակ և պատժաչափ որոշելիս պետության կողմից պետք է ապահովվի պետական հակազդեցության համաչափությունը կատարված հանցանքին:

Այս համատեքստում, անհրաժեշտ է նկատի ունենալ, որ Նախագծի առաջարկը՝ պատիժների խստացման վերաբերյալ, չի բխում ՀՀ քրեական օրենսգրքում հանցավոր

արարքների համար նախատեսված պատժատեսակների և պատժաչափերի հիմքում դրված տրամաբանությունից: Մասնավորապես թմրանյութերի ապօրինի շրջանառության համար Նախագծով առաջարկվում են այնպիսի պատժաչափեր, որպիսիք նախատեսված են ցեղասպանության, մարդկության դեմ ուղղված հանցագործությունների, պատերազմական ծանրագույն հանցագործությունների, ծանրացնող հանգամանքներով սպանության, պետական դավաճանության, ահաբեկչության, զանգվածային ոչնչացման զենք փորձարկելու հանցակազմերով, ինչն ակնհայտորեն խաթարում է արարքի և հանցավորի հանրային վտանգավորության և պատժի միջև համաչափության սկզբունքը:

Հետևաբար՝ հիմք ընդունելով վերոգրյալը՝ գտնում ենք, որ պատժաչափերի՝ առաջարկվող խստացումները չեն բխում պետության կողմից որդեգրած քրեական քաղաքականության հիմնարար սկզբունքներից, ավելին՝ խաթարում են քրեական ներգործության միջոցների համակարգային համաչափությունը: Ուստի, գտնում ենք, որ հիմնավորված չէ պատիժների խստացման անհրաժեշտությունը և նպատակահարմարությունը:

2. Միևնույն ժամանակ անդրադառնալով Նախագծի մյուս առաջարկին՝ թմրամիջոցների ապօրինի շրջանառությանը վերաբերելի հոդվածներում արարքը ծանրացնող և առավել ծանրացնող հանգամանքների շարքը լրացնելու վերաբերյալ, հայտնում ենք հետևյալը. նկատի ունենալով վերջին տարիներին համացանցային տարբեր հավելվածների միջոցով իրականացվող թմրամիջոցների ապօրինի շրջանառության, ինչպես նաև այդ հանցանքների կատարմանը անչափահասների ներգրավման դեպքերի աճը՝ դրանց դեմ առավել արդյունավետ պայքարելու և դրանց պատշաճ քրեաիրավական արձագանք տալու նպատակով համապատասխան հոդվածներում այդ արարքները ծանրացնող և առավել ծանրացնող հանգամանքների նախատեսելը հնարավորություն կտա հանցանք կատարած անձի նկատմամբ նշանակել ավելի խիստ և համարժեք պատիժ: Այդ կարգավորումներով կիրացվի նաև Նախագծի նպատակը՝ խնդրո առարկա արարքների համար նախատեսված քրեական պատասխանատվությունը խստացնելու վերաբերյալ:

Այս համատեքստում, հարկ է նկատի ունենալ հետևյալը.

2.1. Նախագծով առաջարկվում է ՀՀ քրեական օրենսգրքի 393-րդ հոդվածի 3-րդ մասը լրացնել և որպես հանցանքի ծանրացնող տեսակ նախատեսել արարքի կատարումը «անչափահասի ներգրավմամբ»:

Գտնում ենք, որ «անչափահասի ներգրավմամբ» եզրույթի օգտագործումը գործնականում կարող է տարբեր մեկնաբանություններ առաջացնել այն առումով, թե

արդյո՞ք նշված եզրույթի բովանդակությունը ներառում է նաև թմրամիջոց, հոգեմետ (հոգեներգործուն) նյութ, դրանց պատրաստուկ կամ դրանց համարժեք նյութ (անալոգ) կամ դրանց ածանցյալներն անչափահասներին իրացնելը, քանի որ իրացնելու դեպքում տերմինաբանական տեսանկյունից ներգրավելու հատկանիշը բացակայում է:

Տվյալ դեպքում, երբ հենց անչափահասին է իրացվում թմրամիջոց, վերջինս չի ներգրավվում արարքի կատարման մեջ, քանզի ներգրավելը հանցանքի օբյեկտիվ կողմի գործողություններից որևէ մեկին ամբողջությամբ կամ մասամբ մասնակից դարձնելն է, սակայն անչափահասին թմրամիջոց իրացնելու դեպքում վերջինս չի մասնակցում հանցակազմի որևէ արարքի կատարման:

Հաշվի առնելով վերոգրյալը և նկատի ունենալով նաև Նախագծի ընդունման հիմնավորումները, կարգավորման նպատակը, թմրամիջոցների ապօրինի շրջանառության դեմ պայքարի խստացման անհրաժեշտությունը՝ այդ թվում՝ նաև անչափահասների շրջանում, առաջարկում ենք՝ «անչափահասի ներգրավմամբ» բառերը փոխարինել «անչափահասի ներգրավմամբ կամ անչափահասի նկատմամբ» բառերով: Ընդ որում՝ նույն դիտարկումները հավասարապես վերաբերում են նաև ՀՀ քրեական օրենսգրքի 394-րդ հոդվածի՝ Նախագծով առաջարկվող կարգավորումներին:

Կարծում ենք, նշված առաջարկությունն էլ ավելի է ապահովելու Նախագծի իրավական որոշակիությունը, բացի այդ հստակ ու կոնկրետ ընդգծվելու է անչափահասներին թմրամիջոցներ իրացնելու հատուկ անհանդուրժողականությունն ու դրա դեմ պայքարի նպատակով առանձնակի պատժողական քաղաքականությունը:

2.2. Նախագծով առաջարկվում է նաև ՀՀ քրեական օրենսգրքի 402-րդ հոդվածի 2-րդ մասի 5-րդ կետում «վիճակի խոցելիությունը» բառերից հետո լրացնել «, անօգնական վիճակում գտնվելը» բառերը, որով, ըստ էության, քրեական պատասխանատվություն է նախատեսելու անօգնական վիճակում գտնվող անձին թմրամիջոցի, հոգեմետ (հոգեներգործուն) նյութի, դրանց պատրաստուկի կամ դրանց համարժեք նյութի (անալոգի) կամ դրանց ածանցյալի գործածմանը հակելու կամ ներգրավելու համար: ՀՀ քրեական օրենսգրքի 402-րդ հոդվածի 2-րդ մասի 5-րդ կետի տրամաբանությունը պահպանելու նպատակով առաջարկում ենք «, անօգնական վիճակում գտնվելը» բառերը փոխարինել «, անօգնական վիճակը» բառերով:

Միևնույն ժամանակ, Նախագծի ընդհանուր տրամաբանությունը պահելու նպատակով՝ առաջարկում ենք ՀՀ քրեական օրենսգրքի 402-րդ հոդվածի 2-րդ մասի 1-ին կետում «անչափահասի նկատմամբ» բառերը փոխարինել «տեղեկատվական կամ

հաղորդակցական տեխնոլոգիաներն օգտագործելով» բառերով, իսկ 3-րդ մասում լրացնել նոր՝ արարքը առավել ծանրացնող հանգամանք՝ արարքը անչափահասի նկատմամբ կատարելը:

2.3. Անդրադառնալով նաև ՀՀ քրեական օրենսգրքի 396-րդ հոդվածի 2-րդ մասի դիսպոզիցիայում կատարվող փոփոխությանը, հարկ ենք համարում նշել, որ օրենսդրական տեխնիկայի կանոններից ելնելով՝ հանցանքի որակյալ տեսակի մեկից ավելի ծանրացնող հանգամանքները նպատակահարմար է թվարկել հոդվածի մասում կետեր ավելացնելով և կետերում նշված ծանրացնող հանգամանքների միջև «կամ» շաղկապն օգտագործելով: Բացի այդ, քանի որ ՀՀ քրեական օրենսգրքի 396-րդ հոդվածն ունի նաև 3-րդ մաս, որտեղ նշված է «Սույն հոդվածի 1-ին մասով նախատեսված արարքը», ուստի հոդվածի 2-րդ մասի դիսպոզիցիայում կատարվող փոփոխության հետ մեկտեղ անհրաժեշտ է հոդվածի 3-րդ մասում «1-ին» թիվը փոխարինել «1-ին կամ 2-րդ» թվերով և բառով, որպեսզի 2-րդ մասում ավելացվող նոր ծանրացնող հանգամանքը վերաբերի նաև հոդվածի 3-րդ մասին:

2.4. Բացի այդ, նկատի ունենալով թմրամիջոցների ապօրինի շրջանառության դեմ պայքարի նշանակությունը և կարևորությունը՝ նույնասեռ հանցանքների կատարման համար քրեական պատասխանատվության միատեսակությունն ապահովելու նպատակով առաջարկում ենք նաև.

- Արարքը տեղեկատվական կամ հաղորդակցական տեխնոլոգիաներն օգտագործելով և անչափահասի ներգրավմամբ կատարելը որպես արարքը ծանրացնող և առավել ծանրացնող հանգամանքներ նախատեսել համապատասխանաբար ՀՀ քրեական օրենսգրքի 397-րդ հոդվածի 2-րդ և 3-րդ մասերում, ՀՀ քրեական օրենսգրքի 398-րդ հոդվածի 2-րդ և 3-րդ մասերում,

- Արարքը անչափահասի ներգրավմամբ կատարելը որպես արարքը առավել ծանրացնող հանգամանք նախատեսել ՀՀ քրեական օրենսգրքի 399-րդ հոդվածի 3-րդ մասում և ՀՀ քրեական օրենսգրքի 404-րդ հոդվածի 3-րդ մասում,

- ՀՀ քրեական օրենսգրքի 401-րդ հոդվածում նախատեսել արարքը ծանրացնող հանգամանք, այն է՝ արարքը անչափահասի նկատմամբ կատարելը և որպես պատիժ նախատեսել ազատազրկում՝ չորսից ութ տարի ժամկետով,

- ՀՀ քրեական օրենսգրքի 405-րդ հոդվածի 2-րդ և 3-րդ մասերում որպես արարքը ծանրացնող և առավել ծանրացնող հանգամանքներ նախատեսել արարքը համապատասխանաբար տեղեկատվական կամ հաղորդակցական տեխնոլոգիաներն

օգտագործելով և անչափահասի ներգրավմամբ կամ անչափահասի նկատմամբ կատարելը:

Այսպիսով, հարկ ենք համարում ընդգծել, որ թմրամիջոցների ապօրինի շրջանառությանը վերաբերող՝ ՀՀ քրեական օրենսգրքում նախատեսված արարքների կատարման համար նախատեսված պատիժների խստացման անհրաժեշտությունը և նպատակահարմարությունը բացակայում է, իսկ այդ արարքները նախատեսող համապատասխան հոդվածներում արարքը ծանրացնող և առավել ծանրանցող հանգամանքների շարքը լրացնելու և՛ անհրաժեշտությունը, և՛ նպատակահարմարությունը հիմնավորված է, ավելին՝ առաջարկում ենք դրանք նախատեսել նաև ՀՀ քրեական օրենսգրքի՝ «Թմրամիջոցների, հոգեմետ (հոգեներգործուն) նյութերի, դրանց պատրաստուկների, պրեկուրսորների, խիստ ներգործող կամ թունավոր նյութերի օրինական շրջանառության դեմ ուղղված հանցագործությունները» վերտառությամբ 40-րդ գլխի մյուս հոդվածներում:

ՆԱԽԱԳԻԾ

Պ-998-20.01.2025-ՊԻ-011/0

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՕՐԵՆՔԸ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՔՐԵԱԿԱՆ ՕՐԵՆՍԳՐՔՈՒՄ
ՓՈՓՈԽՈՒԹՅՈՒՆՆԵՐ ԵՎ ԼՐԱՅՈՒՄՆԵՐ ԿԱՏԱՐԵԼՈՒ ՄԱՍԻՆ

Հոդված 1. 2021 թվականի մայիսի 5-ի Հայաստանի Հանրապետության քրեական օրենսգրքի (այսուհետ՝ Օրենսգրք) 393-րդ հոդվածում՝

1) 1-ին մասի «երեքից վեց» բառերը փոխարինել «հինգից ութ» բառերով.

2) 2-րդ մասի 7-րդ կետում «՝» կետադրական նշանը փոխարինել «,» կետադրական նշանով.

3) 2-րդ մասը լրացնել 8-րդ կետով՝ հետևյալ բովանդակությամբ.

«8) տեղեկատվական կամ հաղորդակցական տեխնոլոգիաների միջոցով՝».

4) 2-րդ մասի «չորսից ութ» բառերը փոխարինել «ութից տասներկու» բառերով.

5) 3-րդ մասի 2-րդ կետում «՝» կետադրական նշանը փոխարինել «,» կետադրական նշանով.

6) 3-րդ մասը լրացնել 3-րդ կետով՝ հետևյալ բովանդակությամբ.

«3) անչափահասի ներգրավմամբ՝».

7) 3-րդ մասի «վեցից տասներկու» բառերը փոխարինել «տասնչորսից քսան» բառերով, իսկ «ժամկետով» բառից հետո լրացնել «կամ ցմահ ազատազրկմամբ» բառերը:

Հոդված 2. Օրենսգրքի 394-րդ հոդվածում՝

1) 2-րդ մասի 3-րդ կետում «՝» կետադրական նշանը փոխարինել «,» կետադրական նշանով.

2) 2-րդ մասը լրացնել 4-րդ կետով՝ հետևյալ բովանդակությամբ.

«4) տեղեկատվական կամ հաղորդակցական տեխնոլոգիաների միջոցով՝».

3) 3-րդ մասի 2-րդ կետում «՝» կետադրական նշանը փոխարինել «,» կետադրական նշանով.

4) 3-րդ մասը լրացնել 3-րդ կետով՝ հետևյալ բովանդակությամբ.

«3) անչափահասի ներգրավմամբ՝»:

Հոդված 3. Օրենսգրքի 396-րդ հոդվածում՝

1) 1-ին մասում «տուգանքով՝ առավելագույնը տասնապատիկի չափով, կամ հանրային աշխատանքներով՝ առավելագույնը հարյուր ժամ տեւողությամբ, կամ ազատության սահմանափակմամբ՝ առավելագույնը մեկ տարի ժամկետով, կամ կարճաժամկետ

ազատագրկմամբ՝ առավելագույնը մեկ ամիս ժամկետով, կամ ազատագրկմամբ՝ առավելագույնը մեկ» բառերը եւ կետադրական նշանները փոխարինել «ազատագրկմամբ՝ առավելագույնը երեք» բառերով եւ կետադրական նշաններով.

2) 2-րդ մասը շարադրել հետեւյալ խմբագրությամբ.

«2. Սույն հոդվածի 1-ին մասով նախատեսված արարքը, որը կատարվել է խոշոր չափերով, ինչպես նաեւ տեղեկատվական կամ հաղորդակցական տեխնոլոգիաներն օգտագործելով՝ պատժվում է ազատագրկմամբ՝ երկուսից վեց տարի ժամկետով:».

3) 3-րդ մասի «երկուսից հինգ» բառերը փոխարինել «չորսից ութ» բառերով:

Հոդված 4. Օրենսգրքի 402-րդ հոդվածի 2-րդ մասում՝

1) 5-րդ կետում «վիճակի խոցելիությունը» բառերից հետո լրացնել «, անօգնական վիճակում գտնվելը» բառերը եւ կետադրական նշանը, իսկ «՝» կետադրական նշանը փոխարինել «,» կետադրական նշանով.

2) լրացնել 6-րդ կետ՝ հետեւյալ բովանդակությամբ.

«6) տեղեկատվական կամ հաղորդակցական տեխնոլոգիաների միջոցով՝»:

Հոդված 5.

Սույն օրենքն ուժի մեջ է մտնում պաշտոնական հրապարակմանը հաջորդող օրվանից:

ՀԻՄՆԱՎՈՐՈՒՄ

«ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՔՐԵԱԿԱՆ ՕՐԵՆՍՊՐՔՈՒՄ ՓՈՓՈԽՈՒԹՅՈՒՆՆԵՐ ԵՎ ԼՐԱՑՈՒՄՆԵՐ ԿԱՏԱՐԵԼՈՒ ՄԱՍԻՆ» ՕՐԵՆՔԻ ՆԱԽԱԳԾԻ

1. Ընթացիկ իրավիճակը եւ իրավական ակտի ընդունման անհրաժեշտությունը.

Թմրամիջոցների ապօրինի շրջանառությունն այսօր լուրջ խնդիր է ինչպես ամբողջ աշխարհում, այնպես էլ՝ Հայաստանի Հանրապետությունում: Ընդ որում, աշխարհի տարբեր երկրներում թմրամիջոցների ապօրինի շրջանառության համար նախատեսվում են քրեաիրավական ներգործության բավականին խիստ միջոցներ: Այսպես, Վրաստանում թմրամիջոցների եւ պրեկուրսորների պատրաստման, արտադրության, ձեռքբերման, պահպանման, տեղափոխման, իրացման համար նախատեսվում է ազատագրկում՝ մինչեւ 11 տարի ժամկետով, Թուրքիայում անչափահասներին թմրամիջոցներ եւ խթանիչներ իրացնելու եւ տրամադրելու համար նախատեսվում է ազատագրկում առնվազն 15 տարի ժամկետով, Իրանի Իսլամական Հանրապետությունում թմրամիջոցների ապօրինի շրջանառության հետ կապված հարաբերությունները կարգավորվում են «Թմրանյութերի դեմ պայքարի մասին» օրենքով: Մինչեւ 50 գրամ արգելված թմրանյութերի ներմուծման եւ արտահանման, արտադրության, տարածման եւ իրացում համար նախատեսվում է տուգանք՝ 60 մլն դիալի (մոտ 550.000 ՀՀ դրամ) չափով, իսկ ավելի քան 5 կգ արգելված թմրանյութերի ներմուծման եւ արտահանման, արտադրության, տարածման եւ իրացման համար նախատեսվում է մահապատիժ եւ հանցագործության արդյունքում ձեռք բերված գույքի բռնագանձում: Ռուսաստանի Դաշնությունում կազմակերպված խմբի կողմից, ծառայողական դիրքի օգտագործմամբ, չափահասի կողմից անչափահասին խոշոր

չափերի թմրամիջոցների, հոգեմետ նյութերի, դրանց անալոգների ապօրինի արտադրության, իրացման, փոխանցման, թմրամիջոցներ կամ հոգեմետ նյութեր պարունակող բույսերի կամ դրանց մասերի ապօրինի իրացման կամ փոխանցման համար նախատեսվում է ազատազրկում 10-20 տարի ժամկետով՝ որոշ պաշտոններ զբաղեցնելու եւ գործունեության որոշ տեսակներով զբաղվելու իրավունքից մինչեւ 20 տարի ժամանակով զրկելով կամ առանց վերջինի եւ տուգանքով մինչեւ 1 մլն ռուբլու (մոտ 4 մլն ՀՀ դրամ) չափով կամ դատապարտվածի մինչեւ 5 տարվա աշխատավարձի կամ նրա այլ եկամտի չափով:

Թմրամիջոցների ապօրինի շրջանառությունն անմիջականորեն կապված է մեր ազգաբնակչության առողջության հետ: Թմրամիջոցների ապօրինի շրջանառության դեմ պայքարը միշտ եղել է ՀՀ ՆԳՆ ոստիկանության մշտադիտարկման ներքո: Պետք է նշել, որ այսօր առավել տարածված է համացանցային հավելվածների միջոցով թմրամիջոցների ապօրինի շրջանառությունը:

2023թ. ընթացքում հանրապետության իրավապահ մարմինների կողմից հայտնաբերվել է թմրամիջոցների, հոգեմետ (հոգեներգործուն) նյութերի եւ դրանց արեկուրսորների հետ կապված հանցագործությունների 5070 դեպք, նախորդ տարվա 2266-ի դիմաց, գրանցվել է աճ 2804 դեպքով կամ 123.7%-ով:

Հանցագործության դեպքերից 2802-ը վերաբերել են թմրամիջոցների, հոգեմետ (հոգեներգործուն) նյութերի եւ դրանց արեկուրսորների ապօրինի իրացմանը, այդպիսով՝ 2022թ. նույն ժամանակահատվածի համեմատ գրանցվել է աճ 1771 իրացման դեպքով, կամ՝ 171.7 %-ով (2022թ.՝ 1031):

2023թ. ընթացքում հանրապետության տարածքում արձանագրվել է առանց իրացնելու նպատակի թմրամիջոցների անօրինական շրջանառության 1762 դեպք, ինչը 1076 դեպքով ավելի է նախորդ տարվա համեմատությամբ (2022թ.՝ 686 դեպք): Թմրամիջոցների անօրինական շրջանառության դեպքերի կտրուկ ավելացումը պայմանավորված է ընթացիկ տարվա ընթացքում համացանցի միջոցով թմրամիջոցների անօրինական շրջանառության դեպքերի արձանագրման աճով:

2023թ. ընթացքում ՀՀ ՆԳՆ ոստիկանության ստորաբաժանումների կողմից ձեռնարկված օպերատիվ-հետախուզական միջոցառումների արդյունքում բացահայտվել է համացանցի միջոցով թմրամիջոցների անօրինական շրջանառության 489 դեպք, որոնցից 128-ը իրացման դեպքեր են, իսկ 361-ը՝ ձեռքբերման (2022թ.՝ 134 դեպք, որոնցից 37-ը՝ իրացման, 97-ը՝ ձեռքբերման):

2023 թվականի ընթացքում հանրապետության իրավապահ մարմինների կողմից ձեռնարկված միջոցառումների արդյունքում ապօրինի շրջանառությունից առգրավվել է 202 կգ 60 գր տարբեր տեսակի թմրամիջոցներ (2022թ. 119 կգ 70 գր):

Ըստ նարկոլոգիական ծառայությունների կողմից իրականացվող հաշվառումների՝ տարեցտարի աճում է թմրամիջոցներ օգտագործող անձանց թիվը (2018թ. -6951, 2019թ. - 7209, 2020թ. -7392, 2021թ. -7570, 2022թ. - 7738):

Իրականացված վերլուծությունները վկայում են, որ նկատվում է համացանցի միջոցով թմրամիջոցների անօրինական շրջանառության դեպքերի շարունակական աճ: ՀՀ ՆԳՆ ոստիկանության քրեական ոստիկանության գլխավոր վարչության թմրամիջոցների

անօրինական շրջանառության դեմ պայքարի վարչության կողմից իրականացվում են ամենօրյա ստուգումներ՝ նոր բացված, անվանափոխված եւ փակված թմրամիջոցների վաճառքով զբաղվող համացանցային «խանութներ» հայտնաբերելու համար: Այս պահի դրությամբ վարչության ծառայողների տեսադաշտում են գտնվում թվով 620-ից ավելի խանութներ կամ ալիքներ: Խանութներից բացի կան նաեւ 100-ից ավելի զրուցարաններ, որտեղ հիմանականում իրականացվում է թմրամիջոցների գովազդ:

Հաշվի առնելով վերոգրյալը՝ անհրաժեշտություն է առաջացել փոփոխություններ եւ լրացումներ կատարել Քրեական օրենսգրքում: Նախագծում նախատեսվող փոփոխությունները նպատակ ունեն՝ բարձրացնելու տեղեկատվական կամ հաղորդակցական տեխնոլոգիաների միջոցով Հայաստանի Հանրապետության տարածքում թմրամիջոցների ապօրինի շրջանառության դեմ պայքարի արդյունավետությունը:

Հայաստանի Հանրապետությունում արձանագրված դեպքերի վերլուծության արդյունքում պարզ է դառնում, որ կտրուկ ավելացել է տեղեկատվական կամ հաղորդակցական տեխնոլոգիաների միջոցով թմրամիջոցների ապօրինի շրջանառությունը: Ընդ որում, 2024 թվականի ընթացքում արձանագրվել է համացանցի միջոցով թմրամիջոցների անօրինական շրջանառության 252 դեպք, որոնցից 62-ը թմրամիջոցներ իրացնելու դեպքեր են, իսկ 190-ը՝ ձեռքբերման: Ուստի, նախագծով նախատեսվող կարգավորմամբ տեղեկատվական կամ հաղորդակցական տեխնոլոգիաների միջոցով թմրամիջոցների շրջանառությունը դիտարկվում է որպես հանցանքը ծանրացնող հանգամանք:

Բացի այդ, հաշվի առնելով թմրամիջոցների ապօրինի շրջանառության դրսեւորում հանդիսացող մի շարք հանցատեսակների վտանգավորությունը, այդ թվում՝ բնակչության առողջությանը հասցվող վնասի համատեքստում, անհրաժեշտ է որոշ հանցատեսակների պարագայում խստացնել պետության քրեաիրավական արձագանքը՝ այն համապատասխանեցնելով տվյալ արարքների իրական հանրային վտանգավորության աստիճանին եւ բնույթին:

2. Կարգավորման նպատակը եւ բնույթը.

Նախագծով նախատեսվում է թմրամիջոցների, հոգեմետ (հոգեներգործուն) նյութերի, դրանց պատրաստուկների, պրեկուրսորների, խիստ ներգործող կամ թունավոր նյութերի օրինական շրջանառության դեմ ուղղված հանցագործություններին վերաբերելի հոդվածներում արարքը ծանրացնող հանգամանքների շարքը լրացնել:

Մասնավորապես, ՀՀ քրեական օրենսգրքի 393-րդ, 394-րդ եւ 402-րդ հոդվածների 2-րդ մասերում ծանրացնող հանգամանք է սահմանվել արարքը տեղեկատվական կամ հաղորդակցական տեխնոլոգիաների միջոցով կատարելը, իսկ 393-րդ եւ 394-րդ հոդվածների 3-րդ մասերում որպես առանձնապես ծանրացնող հանգամանք է սահմանվել անչափահասի ներգրավմամբ արարքը կատարելը:

Նախագծով թմրամիջոցի, հոգեմետ (հոգեներգործուն) նյութի, դրանց պատրաստուկի կամ դրանց համարժեք նյութի (անալոգի) կամ դրանց ածանցյալի գործածմանը հակելու կամ ներգրավելու համար արարքը ծանրացնող հանգամանքների թվում սահմանվել են նաեւ անձի անօգնական վիճակն օգտագործելով հանցանքը կատարելու վեաբերյալ կարգավորումներ:

Բացի այդ, նախատեսվել է խստացնել որոշ հանցագործությունների համար քրեական պատասխանատվությունը: Մասնավորապես, ՀՀ քրեական օրենսգրքի 393-րդ հոդվածի 1-ին մասով առաջարկվում է նախատեսել պատիժ՝ 5-8 տարի ժամկետով ազատազրկում, ՀՀ քրեական օրենսգրքի 393-րդ հոդվածի 2-րդ մասով նախատեսել պատիժ՝ 8-12 տարի ժամկետով ազատազրկում, ՀՀ քրեական օրենսգրքի 393-րդ հոդվածի 3-րդ մասով նախատեսել պատիժ՝ 14-20 տարի ժամկետով ազատազրկում կամ ցմահ ազատազրկում, ՀՀ քրեական օրենսգրքի 396-րդ հոդվածի 1-ին մասով նախատեսել պատիժ՝ առավելագույնը 3 տարի ժամկետով ազատազրկում, նույն հոդվածի 2-րդ մասով նախատեսել պատիժ՝ 2-6 տարի ժամկետով ազատազրկում, իսկ նույն հոդվածի 3-րդ մասով նախատեսել պատիժ՝ 4-8 տարի ժամկետով ազատազրկում:

3. Ակնկալվող արդյունքը.

Նախագծի ընդունման արդյունքում թիրախավորված կլինեն տեղեկատվական կամ հաղորդակցական տեխնոլոգիաների միջոցով, ինչպես նաեւ անչափահասի ներգրավմամբ թմրամիջոցների ապօրինի շրջանառությունը, ինչպես նաեւ կիսստացվի թմրամիջոցների ապօրինի շրջանառության դրսեւորում հանդիսացող որոշ հանցագործությունների համար քրեական պատասխանատվությունը:

4. Նախագծի մշակման գործընթացում ներգրավված ինստիտուտները եւ անձինք.

Նախագիծը մշակվել է ՀՀ Ազգային ժողովի պատգամավոր Հայկ Սարգսյանի կողմից՝ ՀՀ ներքին գործերի նախարարության հետ համահեղինակությամբ:

5. ՀՀ պետական բյուջեում ծախսերի եւ եկամուտների մասում ավելացում կամ նվազեցում.

«Հայաստանի Հանրապետության քրեական օրենսգրքում փոփոխություններ եւ լրացումներ կատարելու մասին» օրենքի նախագծի ընդունմամբ պետական բյուջեում ծախսերի եւ եկամուտների ավելացում կամ նվազեցում չի նախատեսվում:



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՎԱՐՉԱՊԵՏ

Ո Ր Ո Շ ՈՒ Մ

N 318 - Ա

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ
ՆԵՐՎԱՅԱՑՈՒՑԻՉ (ՀԱՐԱԿԻՑ ՉԵԿՈՒՑՈՂ) ՆՇԱՆԱԿԵԼՈՒ ՄԱՍԻՆ

Հիմք ընդունելով «Ազգային ժողովի կանոնակարգ» սահմանադրական օրենքի 66-րդ հոդվածի 2-րդ մասը՝

Հայաստանի Հանրապետության արդարադատության նախարարի տեղակալ Գևորգ Զոչարյանին նշանակել Հայաստանի Հանրապետության Ազգային ժողովում

«Հայաստանի Հանրապետության քրեական օրենսգրքում փոփոխություններ և լրացումներ կատարելու մասին» Հայաստանի Հանրապետության օրենքի նախագիծը (Պ-998-20.01.2025-ՊԻ-011/0) քննարկելիս Հայաստանի Հանրապետության կառավարության ներկայացուցիչ (հարակից զեկուցող)։

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՎԱՐՉԱՊԵՏ

Ն. ՓԱՇԻՆՅԱՆ

Երևան

18.04.2025

ՀԱՎԱՍՏՎԱԾ Է
ԷԼԵԿՏՐՈՆԱՅԻՆ
ՍՏՈՐԱԳՐՈՒԹՅԱՄԲ